

SUDSKA POLICIJA

U FEDERACIJI BOSNE I HERCEGOVINE



Oktobar, 2025. godine



Čast nam je, povodom obilježavanja Dana sudske policije, iskazati zahvalnost svima koji su na bilo koji način dali doprinos u nastanku i razvoju Sudske policije u Federaciji Bosne i Hercegovine.

Kroz ovu brošuru ukratko ćemo prikazati organizaciju, nadležnosti, ovlaštenja i ulogu Sudske policije u pravosudnom sistemu.



◆ O nama

Sudska policija u Federaciji Bosne i Hercegovine je samostalni policijski organ, uspostavljena u okviru sistema sudske vlasti u Federaciji Bosne i Hercegovine, osnovana radi preduzimanja radnji kojim se osigurava uspješno vođenje odgovarajućeg sudskog postupka i stvaranje sigurnosnih uvjeta za rad pravosudnih institucija u Federaciji Bosne i Hercegovine.



◆ Naša misija



Naša misija je da na profesionalan način i blagovremeno izvršavamo sve naredbe sudova i tužilaštava, stvaramo siguran ambijent za rad pravosudnih institucija, nosilaca pravosudnih funkcija i drugih

učesnika u postupku, te da kroz svoje djelovanje doprinesemo da pravosuđe u Federaciji Bosne i Hercegovine bude profesionalno, nezavisno i nepristrasno.


◆ Naša vizija

Sudska policija je profesionalna policijska agencija koja efikasnim radom i funkcionalnom organizacijom pomaže u radu pravosuđa, doprinosi jačanju povjerenja građana u pravosudni sistem i osigurava zaštitu vladavine prava.





◇ Nastanak i razvoj Sudske policije



Sudska policija u Federaciji Bosne i Hercegovine je prva institucija ove vrste sa modelom nadležnosti i organizacije koji je uspostavljen u Bosni i Hercegovini i zemljama okruženja.

Osnovana je shodno odredbi člana IV C.8.(1) Ustava Federacije Bosne i Hercegovine, kojom je utvrđeno da

će se osnovati sudska policija radi pomoći sudovima u Federaciji Bosne i Hercegovine, te shodno Zakonu o sudskoj policiji u Federaciji Bosne i Hercegovine, koji uređuje ovlaštenja, organizaciju, sredstva za rad, prava i obaveze, radne odnose i druga pitanja od značaja za rad Sudske policije u Federaciji Bosne i Hercegovine.

◇ Zašto obilježavamo 10. oktobar?



Obilježavanje 10. oktobra podsjeća na nastanak, početke i razvoj Sudske policije, njen ustroj i značaj.

Prvi Zakon o sudskoj policiji donesen je 1996. godine i objavljen u Službenim novinama Federacije BiH, broj 19/96 od dana 10.10.1996. godine.

Tako je 10. oktobar, odlukom predsjednika Vrhovnog suda Federacije Bosne i Hercegovine iz 2019. godine, određen kao zvaničan Dan sudske policije.

Prvih dvadeset službenika sudske policije su sa radom počeli dana 04.02.1999. godine.



Nakon reforme pravosuđa i reforme krivičnog zakonodavstva u Bosni i Hercegovini i Federaciji Bosne i Hercegovine 2004. godine, donesen je Zakon o izmjenama i dopunama Zakona o Sudskoj policiji u Federaciji Bosne i Hercegovine koji je objavljen u Službenim novinama Federacije BiH, broj 37/04. Tim zakonom je,



pored ostalog, bilo definisano da će, osim osiguranja sudova, Sudska policija obavljati i poslove iz svoje nadležnosti za tužilaštva u Federaciji Bosne i Hercegovine, odnosno za Federalno tužilaštvo i kantonalna tužilaštva.

Značajan iskorak u razvoju Sudske policije ostvaren je 2020. godine donošenjem novog Zakona o sudskoj policiji, koji je objavljen u Službenim novinama Federacije BiH, broj 77/20.

Novim zakonom je preciznije regulisan položaj, mjesto i uloga Sudske policije u pravosudnom sistemu Federacije Bosne i Hercegovine.



◇ Kako smo organizovani?



Upravljanje

Sudskom policijom upravlja predsjednik Vrhovnog suda Federacije Bosne i Hercegovine.



Rukovođenje

Sudskom policijom rukovodi direktor Sudske policije u Federaciji Bosne i Hercegovine, koji za svoj rad odgovara predsjedniku Vrhovnog suda Federacije Bosne i Hercegovine.




Organizacione jedinice

Sjedište Sudske policije u Federaciji Bosne i Hercegovine je u Sarajevu.

Danas Sudska policija ima 16 osnovnih organizacionih jedinica, 59 unutrašnjih organizacionih jedinica, sistematizovano 675 izvršilaca i zaposleno preko 600 izvršilaca.





Pored organizacionih jedinica u sjedištu Sudske policije i svih deset kantona, Sudska policija zbog svoje uloge i specifičnih nadležnosti, ima ustrojene i specijalizirane jedinice kao što su Jedinica za specijalističku podršku Sudske policije i Jedinica za sigurnost i zaštitu Sudske policije.





◆ Naše nadležnosti

Prikupljanje informacija

Sudska policija može vršiti prikupljanje informacija potrebnih za izvršenje poslova i zadataka iz nadležnosti Sudske policije.



Dovođenje

Sudska policija postupa po pismenim naredbama pravosudnih institucija za dovođenje osumnjičenih i optuženih osoba, svjedoka i vještaka, a isto podrazumijeva dovođenje iz mjesta prebivališta ili boravišta osobe, iz ustanova ili drugog mjesta gdje se osoba koju potražuje pravosudna institucija nalazi.



Lišenje slobode

Sudska policija u skladu sa pismenom naredbom suda vrši poslove lišenja slobode osoba koje se nisu dobrovoljno javile na izdržavanje kazne zatvora i osoba kojima je određena mjera pritvora.



Sprovođenje osoba lišenih slobode

Sudska policija vrši sprovođenje osoba lišenih slobode u skladu sa pismenom naredbom suda, u slučajevima premještanja pritvorene osobe iz jedne u drugu ustanovu, pritvorenika u ustanove za izdržavanje kazne zatvora ili u ustanovu za izdržavanje mjere obaveznog liječenja, sprovođenja osoba koje su u skladu sa naredbama sudova o raspisanim potjernicama lišene slobode od strane drugih policijskih agencija i druga sprovođenja lica lišenih slobode koja su vezana za procesne radnje u odgovarajućem postupku.



Zadržavanje osoba lišenih slobode

Sudska policija preduzima mjere fizičkog i tehničkog osiguranja osoba lišenih slobode kojima je određena mjera tužilačkog i sudijskog zadržavanja propisanog odredbama ZKP-a FBiH i može trajati do 48 sati, kao i zadržavanja osoba koje se imaju prinudno dovesti koje može trajati do 24 sata.



Provođenje sudskih odluka

Sudska policija pruža pomoć u provođenju sudskih odluka kojom prilikom stvara potrebne sigurnosne uvjete za nesmetano provođenje sudskih odluka i sigurnost učesnika u postupku izvršenja, te neposredno provodi sudske odluke u postupku oduzimanja nezakonito stečene imovine krivičnim djelom i istu predaje Federalnoj agenciji za upravljanje oduzetom imovinom.

Zajedno sa Federalnom agencijom za upravljanje oduzetom imovinom Sudska policija aktivno učestvuje u provođenju nadležnosti proisteklih iz Zakona o oduzimanju nezakonito stečene imovine krivičnim djelom u Federaciji Bosne i Hercegovine.



Fizička i tehnička zaštita objekata i imovine



Sudska policija vrši fizičku i tehničku zaštitu objekata i imovine koju koriste pravosudne institucije i Sudska policija, kao i svih osoba koje se nalaze u tim objektima.

Ova zaštita se provodi u odnosu na 56 pravosudnih institucija, od čega se 21 pravosudna institucija osigurava 24 sata dnevno, 42 tokom radnog vremena, dok se ostale osiguravaju u skladu sa potrebama i sigurnosnim procjenama.



Sigurnost u sudnicama i drugim prostorijama

Sudska policija brine o sigurnosti u sudnicama i drugim prostorijama ili prostorima gdje se održavaju ročišta i saslušanja ili se osigurava uspješnost vođenja odgovarajućeg postupka.



Fizička i tehnička zaštita osoba


Sudska policija pruža fizičku i tehničku zaštitu nosiocima pravosudnih funkcija ukoliko je njihova sigurnost ugrožena u vezi obavljanja njihove funkcije ili poslova, a kada to sigurnosni razlozi zahtijevaju i članovima uže porodice i ista može obuhvatati zaštitu po mjestu rada, stanovanja i u pokretu.

Trenutno je u pravosuđu Federacije Bosne i Hercegovine zaposleno više od 950 nosilaca pravosudnih funkcija.



Zaštita svjedoka

Sudska policija, po naredbama pravosudnih institucija, obavlja poslove zaštite svjedoka koji se u krivičnim postupcima tretiraju kao svjedoci pod prijetnjom, ugroženi svjedoci i zaštićeni – anonimni svjedoci, odnosno svjedoci kojima su mjere zaštite određene u skladu sa odredbama Zakona o zaštiti svjedoka pod prijetnjom i ugroženih svjedoka.



◇ Uloga Sudske policije u radu posebnih odjela



Sudska policija, u skladu sa odredbama Zakona o suzbijanju korupcije i organizovanog kriminala u Federaciji Bosne i Hercegovine, pruža pomoć u radu Posebnog odjela Vrhovnog suda Federacije Bosne i Hercegovine i Posebnog odjela Federalnog tužilaštva Federacije Bosne i Hercegovine za suzbijanje korupcije, organizovanog i međukantonalnog kriminala.



◇ Ovlaštenja službenika Sudske policije u obavljanju poslova:

- ✓ provjera i utvrđivanje identiteta osoba;
- ✓ obavljanje razgovora;
- ✓ izdavanje upozorenja i naredbi;
- ✓ privođenje;
- ✓ privremeno ograničenje slobode kretanja;
- ✓ potraga za osobama i stvarima;
- ✓ privremeno oduzimanje predmeta;
- ✓ privremeno korištenje tuđih vozila i komunikacijskih sredstava;
- ✓ ulazak u tuđi stan i druge prostorije;
- ✓ pretres osoba, stana i drugih prostorija, stvari i prijevoznih sredstava;
- ✓ pregled osoba, stana i drugih prostorija, stvari i prijevoznih sredstava;
- ✓ upotreba sredstava prinude;
- ✓ audio i video snimanje na javnim mjestima;
- ✓ obrada osobnih podataka i vođenje evidencija;
- ✓ postupnje sa tajnim podacima i vođenje evidencija

◇ Pregled operativnih aktivnosti

AKTIVNOSTI SUDSKE POLICIJE	2022. GODINA		2023. GODINA		2024. GODINA	
	POSTU- PLJENO	REALIZO- VANO	POSTU- PLJENO	REALIZO- VANO	POSTU- PLJENO	REALIZO- VANO
DOVOĐENJE IZ USTANOVA	6028	6009	6496	6473	6926	6902
SPROVOĐENJE	951	950	1190	1189	1217	1217
DOVOĐENJE	6933	4317	6686	4231	5920	3779
LIŠENJE SLOBODE	399	278	466	340	410	294
ZADRŽAVANJE OSOBA LIŠENIH SLOBODE	1107	1107	1400	1400	1714	1714
ASISTENCIJE	1734	1734	1640	1610	1403	1387
PRIKUPLJANJE INFORMACIJA	108	108	144	144	305	305
MJERE ZAŠTITE NPF	35	35	49	49	99	99
MJERE ZAŠTITE SVJEDOKA	3	3	5	5	2	2
OSIGURANJA SASLUŠANJA I SUDENJA	787	787	1142	1142	1274	1274
OSIGURANJA KONFERENCIJA I SEMINARA	10	10	6	6	6	6
UKUPNO	18095	15338	19225	16590	19276	16979

◆ Obučavanje i usavršavanje službenika Sudske policije

Službenici Sudske policije u Federaciji Bosne i Hercegovine prolaze kroz kontinuiranu obuku i stručno usavršavanje s ciljem jačanja profesionalnih kapaciteta, unaprjeđenja vještina i održavanja visokih standarada sigurnosti i zakonitosti u radu.



◆ Saradnja sa drugima

U obavljanju svojih poslova kontinuirano ostvarujemo saradnju sa sudovima, tužilaštvima, Obavještajno sigurnosnom agencijom Bosne i Hercegovine, policijskim organima na svim nivoima u Bosni i Hercegovini, kazneno - popravnim zavodima i drugim ustanovama, Federalnom agencijom za upravljanje oduzetom imovinom, nadležnim ministarstvima, te drugim organima na svim nivoima vlasti u Bosni i Hercegovini.



Stalna saradnja i koordinacija omogućavaju efikasno izvršenje poslova iz djelokruga rada Sudske policije i stvaraju potrebne preduslove za unaprjeđenje organizacije i rezultata rada Sudske policije.



Saradnja se posebno ostvaruje i sa ciljem razvoja i jačanja kapaciteta Sudske policije. Pored ostalog, može se istaći saradnja sa Visokim sudskim i tužilačkim vijećem Bosne i Hercegovine, Vladom Federacije Bosne i Hercegovine, Federalnim ministarstvom pravde, Federalnim ministarstvom unutrašnjih poslova, Federalnim ministarstvom finansija i drugim institucijama, kao i ambasadama i međunarodnim organizacijama od kojih se posebno mogu izdvojiti: Delegacija Evropske unije u Bosni i Hercegovini, Ambasada Sjedinjenih Američkih država u Bosni i Hercegovini, Ured Vijeća Evrope u Sarajevu, Misija OSCE-a u Bosni i Hercegovini, nevladine organizacije i drugi.

Saradnjom sa institucijama koje pomažu u razvoju i jačanju kapaciteta Sudske policije, osigurava se primjena savremenih standarda i unaprjeđenje profesionalnih kapaciteta.





ČINOVI SLUŽBENIKA SUDSKE POLICIJE U FEDERACIJI BOSNE I HERCEGOVINE



Glavni generalni inspektor
sudske policije



Generalni inspektor
sudske policije



Glavni inspektor
sudske policije



Samostalni inspektor
sudske policije



Viši inspektor
sudske policije



Inspektor
sudske policije



Mlađi inspektor
sudske policije



Stariji narednik
sudske policije



Narednik
sudske policije



Stariji
sudski policajac



Sudski policajac



Kadet
sudske policije

◇ SADRŽAJ

O nama	2
Naša misija	2
Naša vizija	2
Nastanak i razvoj Sudske policije	4
Zašto obilježavamo 10. oktobar?	5
Kako smo organizovani?	7
Naše nadležnosti	12
Ovlaštenja službenika Sudske policije u obavljanju poslova:	18
Pregled operativnih aktivnosti	18
Obučavanje i usavršavanje službenika Sudske policije	19
Saradnja sa drugima	20
Činovi službenika Sudske policije u Federaciji Bosne i Hercegovine ...	22

Sudska policija - podrška pravosuđu za vladavinu prava.



Praćenje našeg rada i kontakt podaci

Adresa: Valtera Perića 15, Sarajevo

Tel.: 033/666-239

Fax.: 033/213-586

www.sudpol-fbih.pravosudje.ba

e-mail: info.spfbih@pravosudje.ba